

Schloofanfall odder über die Philosophie

NORBERT AUTENRIETH



Es is mir ä wunderboorer sadz eigfalln wäi iich grad aafgwachd bin und iich hobbmer dengd den mou iich mir aafschreim denn suer sadz is eine offenbarung und es is der sadz an sich gween obber dann bin iich widder eidösd wanner mir jedz nur grood eifalln däd weil des woar der sadz der alles erklärn hädd kenner ganz anders wäi

Wenn ein Kreter sagt alle Kreter lügen

und ich genau wass dass der baradoxe sadz ned schdimmer kann weils ja immer nu möglich is dass ned alle kreder lügner und nur der anne kreder der den sadz sachd und doudermid is alles möglich oder unmöglich obber des konns ned gehm weil wenn irgerdwoss möglich is dann is ja die möglichkeid des unmöglichen scho endhaldn weil sunsd kennerds ja ned bloas möglich sei weil wenn iich sooch

Ich komme möglicherweise zu dir

dann ist ja möglich dass iich doch ned kumm obber wenn iich sooch

Ich komme unmöglich zu dir

dann is die möglichkeid dass iich kumm ausgeschlossn also is des word möglich ein unding und nur unmöglich is eine vernünftige aussooch als wäi wenn ich sooch

Ich komme etwas früher odder etwas später

gaoor ka aussooch ned is und das ist wie beim

Newton'schen Apfel

der immer affn boodn fälld obber kanner wass wann er des vielleicht amool ned machd nur weil des nu nie bassierd is und ieberhabbd is suer gegensdand nur in einem bezugsystem denkboor also is der abfel an sich ohne jede bedeutung und des word derfier is ned ämool ä zeichn fier irgerdwoss sondern bloas ä ... ä ... ä vereinborung besdnfalls ... und wenni dann a nu begriffe wäi Liebe odder Sehnsucht

heer dann heerdsi des ganz aaf weil des wörter sin däi unendlich vühl bedeutungen homm kenner völich abhängig vo dem bezugsystem in dener sie gebrauchd odder missbrauchd wern woss es selbe is und niemand soong kann wann suwoss woahr odder falsch is und dou is ja scho beinooh verrügd wenn anner maand er müsserd edz

deskriptive Sätze

formulieren odder irgerdwoss

Normatives deduzieren

woss dann woahr odder falsch is odder besdnfalls möglich-unmöglich.

Edz is mer der Satz widder eigfalln!

Was ein Wort bedeutet, kann ein Satz nicht sagen.

Der Satz is obber ned vo mir, sondern vom Ludwig Wittgenstein. Schood.